

Svečano obilježen Dan Gazi Husrev-begove medrese

Friday, 06 January 2012 17:00

Sarajevo, 06. januar 2012. - Danas je prigodnom svečanošću obilježena 475. godišnjica Gazi Husrev-begove medrese. Svečanosti su prisustvovali reisu-l-ulema Islamske zajednice u BiH dr. Mustafa Cerić, zamjenik reisu-l-uleme hfz. Ismet ef Spahić, predstavnici vrha Islamske zajednice kao i drugi brojni uglednici iz javnog i kulturnog života.



Nakon uvodnog ašereta koje je proučio Mensur Kerla, prisutnima se obratio direktor Medrese prof. Zijad Ljevaković koji je između ostalog rekao:

„Često je prisutno zloupotrebljavanje čovjeka u manipuliranju znanjem umjesto da čovjek upotrebljava znanje. Granica nehumanosti se skoro proporcionalno raširila sa usvajanjem novih znanja, a čovjek je pozvan da koristi znanje za postizanje svijeta sa većim prisustvom humanog. U školi smo koja 475. godinu odabire sadržaje i nudi ih onima koji je pohađaju u potrazi za obrazovanjem i odgojem“, kazao je između ostalog direktor Ljevaković.

Iz kolektiva Medrese zahvalnice su dodijeljene prof. Ismetu Veladžiću i kućepazitelju Hamzaliji Bekanu, a zahvalnica je dodijeljena i Harisu ef. Pašaliću, glavnom imamu Oružanih snaga BiH.

Plakete za poseban doprinos i afirmaciju Medrese su dodijeljene prof. dr. Jusufu Ramiću, emeritusu Fakulteta islamskih nauka u Sarajevu i svršniku Gazi Husrev-begove medrese, te Mirsadu Ćemanu, sudiji Ustavnog suda Bosne i Hercegovine, također svršniku Gazi Husrev-begove medrese.

Prilikom primanja plakete dr. Jusuf Ramić je kazao:

„Naš dug prema Islamskoj zajednici je zaista velik. Ne znam da li smo taj dug uspjeli vratiti niti znam koliko smo doprinijeli afirmaciji ove škole. Ja vjerujem da Nastavničko vijeće Medrese to zna pa se jednoglasno odlučilo da ovo priznanje dodijeli meni na čemu se iskreno zahvaljujem“, kazao je između ostalog dr. Ramić.

Na uručenoj plaketi zahvalio se i g. Mirsad Ćeman:

„Sa izuzetnom zahvalnošću nosiću ovo priznanje kao nešto što me je obradovalo ali i učinilo još više odgovornim. Klupe ove škole ja sam napustio davne 1975. godine ali uistinu nijednoga trenutka nisam zaboravio da je to škola kroz koju sam ja prošao. Nisam nikada bio u dilemi da zaboravim tu činjenicu: Da, ja sam završio Gazi Husrev-begovu medresu“, kazao je između ostalog g. Ćeman.

Prisutnima se na kraju obratio i reisu-l-ulema koji se, nakon kratkog podsjećanja na značajni trag koji je za sobom ostavila Gazi Husrev-begova medresa, osvrnuo na izbor ovogodišnjih dobitnika plaketa:

„Dr. Jusuf Ramić i Mirsad Ćeman su najbolji dvojac koji se mogao izabrati za ovo priznanje jer imaju sličnosti u tome da su uporni, istrajni i da puno ne govore, ali ono što urade, urade na najbolji način stoga čestitam prof. Ramiću i Mirsadu Ćemanu na priznanju“, kazao je između ostalog reisu-l-ulema dr. Cerić.



Svečanu atmosferu učenjem ilahija dodatno je uljepšao hor Gazi Husrev-begove medrese, dok je Vanja Muhović prisutne počastio izvođenjem poznatih bosanskih sevdalinki.

Izvor: rijaset.ba